

CARNAVAL DEN TEMPO DI ROMANONAN

ORANJESTAD (AAN): For di Iglesia Maranatha a ricibi e siguiente articulo interesante aki.

Kico ta bo opinion tocante Carnaval? Un di esnan cu a contesta e pregunta aki a bisa cu su opinion ta basa riba e siguiente mandamento cu ta bisa: "Lo bo stima bo prohimo manera bo mes." (Galationan 5:14).

TEMPORADA DI CARNAVAL: Den e temporada di Carnaval hopi hende ta probecha di nan tempo libver pa descansa, viaha of participa cu of den e actividadnan di Carnaval. E aña aki Aruba su Carnaval ta celebra su 40 aña di existencia. Hopi preparacion, esfuerso y hopi placa ta worde inverti den e actividadnan Carnavalesco door di e negociantenan y pueblo Arubano en general.

Tambe den e temporada

aki hopi turista ta viaha bin Aruba djis pa mira of hasta participa den e actividadnan Carnavalesco di Aruba. E hotelnan ta yena rand-rand cu hende di tur nacionalidad. E temporada di Carnaval di e forma aki ta parce un temporada di union na unda no solamente e pueblo di Aruba, pero tambe pueblonan di otro nacionnan ta uni hunto pa celebra e fiesta aki yama Carnaval.

ORIGEN: Por mira cu Carnaval a drenta Aruba oficialmente na aña 1954. Cu otro palabra: 40 aña pasa. Carnaval a worde introduci como un fiesta publico door di e inmigrantenan cu tabata traha na Refineria di Lago. E hendenan aki tabata bini for di e diferente islanan den Caribe, specialmente for di Trinidad unda e Carnaval tabata den 'full swing'.

Pero pa bisa berdad esaki

no ta e origen di Carnaval. Carnaval su origen ta mucho mas bieu cu djis 40, 80, of 100 aña pasa. E origen di Carnaval ta bini for di Medio Oriente cerca e Babilonia-, Hetita-, Phoenisia, y Egipcianan. Nan tabata hacie como un rito di fertilidad na honor di e diosnan. Por ehemplo, e dios di awa, solo, tera, etc.

E Griegonan y e Romanonan tabata honra particularmente e dios di biña, cu ta e dios yama "Bacchanal" den nan Carnaval. Y awendia ainda nos ta tende e palabra aki resona na Aruba den temporada di Carnaval.

Na Roma nan tabata celebra na principio di Januari e asina yama: Saturno. Esaki tabata worde celebra asina aki: For di e pueblo Romano un homber tabata worde eligi como rey. Den un carosa cu tabata un barco

dorna, poni riba wiel, e elegido rey mester a core rond den e procesion cu hopi show y parada den e ciudad. Riba e carosanan aki tabata tin imagen di diosnan, estatuanan sunu y prostitutan. Chistenan sin respet y canticanan di buracheria tabata worde scucha tur caminda, specialmente ora e biña tabata basha manera laman den nan garganta. Habitantenan di Roma cu tabata hendenan honorable y tabata tin un bon number, tabata hiba nan casa- y yiu muherman na lugarnan pafor di Roma den e periodo ey.

E Cristian den e tempo ey (200-300 aña despues di Cristo) no por a ni pensa mes pa participa den Carnaval, pasobra inmediatamente lo el a worde exclui di e santa cena. Pesey un hefe Romano, di un legion, cu a bira Cristian, a worde fusila door di su mesun soldatnan den e aña 303 despues di Cristo, pasobra el a rechaza di bira nan prins di Carnaval. Asina iglesia Romano Catolico a declara e martir aki cu yama Dasio, santo. Esey ta algo cu sin embargo poco Catolico sabi.

Tempo cu Cristianismo a bira religion di e pais bao di e emperador Constatino e Grandi, Carnaval a worde prohibi como un costumber di paganonan. Pero toch e moral y e costumbernaki a drenta den iglesia back door di porta di patras. Iglesia Romano Catolico a protesta fuertemente contra esaki, pero alfin e mester a sera un pacto. A worde combini: Cu unicamente esnan cu lo tené un tempo di ayuno durante 40 dia prome cu Pasco Grandi, lo por a participa den Carnaval. Cerca e paganismo Romano aki a bin acerca algun Aleman, specialmente e bistimento di mascarada cu segun nan lo tabata core cu demononan.

Den siglonan pasa Carnaval no a keda limita pafor di iglesia. Tabata tin misa di payaso, etc. Papanan a protesta fuertemente. Inocentio IV a expulsa tur e pademan cu tabata coopera

cu sorto di fiestanan asina. Ta imposible pa un celebracion asina di Carnaval por ta un bon introduccion pa "Un ayuno pa Dios".

Loke e iglesia Romano Catolico no a alcanza door di e compromisonan aki, a sosode den Reformacion, den un generacion. Na Hulanda, Scandinavia, e parti Protestant di Suiza y gran parti di Alemania, Carnaval no tabata existi mas. Pero despues di 1945, Carnaval tabata worde celebra tambe den hopi lugarnan Protestant. Incredulidad, pasion y sin nombra mas, a yuda pa trece e diosnan bieu di golos pa placa, inmoralidad y supersticion na bida atrobe.

KICO E BIJBEL TA BISA? Awor no ta pica pa haci fiesta. Dios a duna e Israelitanan hopi dianan di fiesta. Pero e mester ta un fiesta cu despues bo no tin mester di tin berguenza. Tambe door di uso di alcohol, locual ta bira motibo pa hopi otro pica, un fiesta asina por bira algo escandaloso. Dios no por ta contento cu esaki. Cu esaki Su Number no ta worde honra. Alcontrario!

Bijbel ta bisa den Galationan 5:19-21 lo siguiente: "Obranan di carni ta cla pa bira, cuanan ta: *kibramento di matrimonio, *fornicacion, *impuresa, *bida sin berguenza, *adoramento di dios falso, *venenamento, *enemistad, *pleito, *cudishi, *rabia, *zundramento, *desunion, *doctrina falso, *envidia, *matamento, *buracheria, *parandiamiento y tur e sorto di cosnan ey, di cuanan mi ta bisa boso di padilanti, mescos cu mi a bisa prome caba, cu esnan cu haci e sorto di cosnan ey, lo no hereda reino di Dios."

Awendia por mira tur e punto bibliconan aki refleha den Carnaval di Aruba. Y Carnaval 40 lo no ta ningun excepcion.

Si bo ta interesa pa sa mas, contact Iglesia Maranatha Diadomingo 10:00 a.m., 6:00 p.m. na Paradijs 4 of via telefon 21030.